

『我的嗜好』

Babuza Chū

Khòaⁿ-tiòh chit-ê tê-bòk, lí chin khó-lêng ē siūⁿ-kóng, “kî-kòai, chit-ê Babuza Chū sī teh pìⁿ sím-mih báng? Beh iōng Pak-kiaⁿ-ōe siá Tâi-bûn? Ân-ne m̄-tiòh kap iōng Pak-kiaⁿ-ōe poaⁿ pò-tē-hì á-sī poaⁿ koa-á-hì káng-khóan? Gû-thâu khi tàu tī bé-bīn, kiám ē thong?”

Bián kín-tiuⁿ, Babuza bē-hiáu iōng Pak-kiaⁿ-ōe siá Hôa-bûn sī chôn sè-kài thong lêng chai ê pì-bit. I ê Hôa-bûn theng-tō kap kok-hāu it-nî ê hák-seng bô sím-mih cheng-chha. M̄-kú nā-sī Tâi-bûn chiū m̄-sī án-ne ô! Thiaⁿ-kóng i chòe-kīn siá chit-phiⁿ “A-Mah” ê kò-sū ū lêng thák-liáu sim sng-sng, ū lêng thák kàu bák-khō hóan âng, mā ū lêng ná thák ná khàu, koh ná khàu ná thák! Chok-chiá pún-lêng siá ôan ê sī mā kám-kak chiok kan-khó, ná-chhiūⁿ teh beh hó ê khang-chhùi iōng iâm koh sīⁿ chit-pái káng-khóan! I ka-kī mā siá kàu lâu bák-sái. Chha chit-sut-á i tiòh chiù-chōa bô beh koh siá!

Lán chit-má beh kóng chit-ê tê-bòk chiū-sī i khó chhō-tiong ê chok-bûn tê-bòk. Tī 1965 hit-chūn, beh thák chhō-tiong ài chham-ka liên-khó. Kok-bîn Tiong-hák ài kàu 1968 chiaⁿ ū. Chiū góa ê lí-kái, Babuza tng-tong-sī pēng bô chin-chiàⁿ liáu-kái chit-ê

tê-bòk ê ì-sù! M̄-kú i chin hó-ūn, σ-pêh ioh mā hō ioh--tiòh! Hó-ka-chài, nā ioh bô tiòh lán chit-má chiū kiám chit-ê lêng lái tàu chò Tâi-bûn ūn-tōng! Sng-sit ū jōa tōa lí kiám chai?

Kî-sit i ē khi chham-ka chhō-tiong liên-khó pún-sin chiū-sī chit-ê chin oh-tit thang lí-kái ê tãi-chì! I thák kok-hāu lóng-chóng mā chiaⁿ thák 5 nî koh 2, 3 kò-gòeh niá. In-ūi in tau chiok sán-chhiaⁿ, sán kàu kúi kiōng beh liáh--khi. M̄-tiòh, sán kàu kúi mā m̄-káⁿ lái liáh, khióng-kiaⁿ ke-thiⁿ lô-hôan! I kan-ta thák-ôan kok-hāu 5 nî, chiū khi kang-tiūⁿ chò-kang, khi tiān-íaⁿ hì-tài bē ki-á-peng, thàn-chiⁿ ká chhù--nih tàu sio-thiⁿ thang tiáh-bí. M̄-chiaⁿ kóng i bô cheng-sek tui kok-hāu pit-giáp. Lián i kok-hāu ê pit-giáp cheng-su mā ká i ê chék-kòan siá m̄-tiòh. Bēng-bēng i sī Chiang-hòa lêng, pit-giáp cheng-su khiok siá chò Tâi-pak lêng. Hāi i āu--lái chham-ka Ko-tiong liên-khó hiám-hiám bē-tàng pò-miá! Chit-chân sū āu-pái chiaⁿ koh lái thng.

Nā kóng-khí 1960 hit-ê pha-hng ê nî-tāi, chhiūⁿ Babuza hit-khóan tui chng-kha poaⁿ-khi Tâi-pak ê chháu-tē gín-á, sông-sông, khong-khong, gōng-gōng, bóng-tóng koh hòng-tōng, thák-chheh thák 5 tang, kiám ū bat chit-tè sái-hák-á pang, sī chin ū bûn-tê..ê! Sui-bóng kóng lâu-su ták-jit lóng ū kau-tài

tiòh-ài siá-jī (chiū-si chò chok-giáp), i mā tiāⁿ-tiāⁿ bô siá liáu, hō in lāu-su kòng kap phah! Chún-kóng ū sī ke-kiám ū siá--kóa, siá--kòe ê jī kiám lóng chai-bat koh ē kì--tit? Che mā-sī bün-tê! Koh chài kóng, Hàn-jī bô cheng-bit, lo-li lo-so, tek-ko tàu chhâ-to, ti-sái lām ke-ko, jī-pêng ē-tàng khng chiàⁿ-pêng mā ē-sái khng tò-pêng, tui chit-ê 10 thóng hòe ê gín-á-phí, ū chài-tiâu pá-ak jōa chē? Só-í sui-jiân Babuza thák 5 nî gōa ê chheh, Hàn-jī sit-chāi bat bô jōa chē. Góa iáu ē kì--tit, tng i khòaⁿ-tiòh chit-ê tê-bók ê sī, i kan-ta bák-chiu kim-kim lāng siong-tiōng, gāng tī hia kui pō kú. M̄-chai beh án-chóaⁿ?

Hit tong-sī ê khó-chhi, ū 2 ê kho-bók: Sng-sút kap Tiong-kok-gí. Sng-sút sī Babuza chū-pún tiòh chin ham-bān ê kho-bók. Chāi-lái i lóng chin kiaⁿ khi kháp---tiòh. Ê kì-tit hák-hāu beh pit-giáp tián-lé chin-chêng 3 lé-pài, in lāu-su Lâm Chú-i-lái(林水來) khi Babuza in chhù, tng-tiòh in a-mah, kóng beh kiò Babuza khi khó chhō-tiong. M̄-chai in án-chóaⁿ kóng, kóng liáu Lâm lāu-su sūi cháu-khi Babuza chò-kang ê phùn-chhat kang-tiūⁿ kā i kóng chit-chân tī-chì. Hit-chūn ê Babuza sit-chāi tui thák-chheh bô sím-mih kah-ì. Tèk-piát sī chit-ê Chú-i-lái-á-sian(tông-òh lóng án-ne kā kiò), in-ūi i bat kā Babuza phah--kòe. Chiū-sī hō i phah-liáu Babuza chiah khi-mō bái kā chheh

lì-lì phòa, chiū-sí-chē-chōa kui-khi bô ài khi hák-hāu thák-chheh! Chóng-sī chò-kang chin thiám-thâu, chò kú mā ē siān. Tèk-piát sī tī hit-ê tók-chhái ê nî-tāi, thâu-ke sī tōa kàu ná siáⁿ--leh! I nā khòaⁿ lí sió-khóa bô kah-ì chiū chhut-chhiú tōa-tōa-lát kā lí pa--lòh--khi! He thâu-ke chò-sit lāng chhō-ló koh ū lát, pa chit-ê lí tiòh thâu-khak mōh teh sèh pòⁿ-kang! Mā bô sím-mih jîn-khōan ê koan-liām, hōaiⁿ-tit chiah lāng ê thâu-lō tiòh-sī án-ne. Thâu-ke siōng tōa! Kap chit-má tú-hó tò-péng! Babuza thiaⁿ-tiòh beh tng-khi hák-hāu thák-chheh, kan-ta siūⁿ-tiòh tī hák-hāu m̄-bián koh hō thâu-ke mā kap phah, chiāⁿ kín chiū tap-èng! Thèng-hāu i tng-khi hák-hāu chiah hoat-hiān i chha-put-to sím-mih lóng bē-hiáu! Án-ne sī beh án-chóaⁿ khi kap lāng khó chhō-tiong? Hó-ka-chài, chit-ê Babuza koh chiám-jiân-á ū cha-bó gín-á iân, in pan ê cha-bó tông-òh lóng chū-tōng cháu-lái kā tàu saⁿ-kāng! I chiū-sī án-ne tī 3 lé-pài lái kā Sng-sút ke-kiám òh--chit--kóa. M̄-kú Tiong-kok-gí chiū bô thang án-ne òh! Kan-ta tòe lāng bóng siá, bóng khòaⁿ, bóng thák! Mā m̄-chai teh thák sím-mih óaⁿ-ko!

Khó-chhi hit-chit-kang, Babuza in a-mah pōe i khi. Khó-chhi-tiūⁿ tī Sam-kong Kok-sió(三光國小), sī Babuza ê bó-hāu. Sng-sút ê tê-bók chin háh Babuza ê

khùi-kháu, chin kín tiòh siá liáu! Koh ū sī-kan thang phak tī toh-á khùn! Āu--lâi in a-mah kâ kóng, “Góa tī gōa-bīn khòaⁿ lí teh khùn, siūⁿ-kóng taⁿ pau-ún hāi..ah! Bē-hiáu siá phak teh khùn! Chit-siaⁿ tiāⁿ-tiòh sī ah-ñng khian kòe khe, khòaⁿ-phòa--lah!” Bô phah-sng Babuza chhìn-chhái khó, σ-péh siá koh khó ē tiâu!!

Āu-hì thoa-pêⁿ, kàu chit-má chiah beh kóng-tiòh chú-tê: Nā-sī hit-ê Tiong-kok-gí, he tiòh ū-iaⁿ ū kàu hêng-gék! It-poaⁿ chhì-tê iáu ke-kiám ē-hiáu, tók-tók sī chok-bùn, chhut chit-ê “in niâ khah hó” ê sím-mih “我的嗜好”! Babuza Hàn-jī chóng-a-kiōng mā chiah bat kúi jī nā-tiāⁿ! Chhut chit-ê “嗜好” tau-té sī sím-mih óaⁿ-ko? Láu-sit kóng, chit-jī “嗜” Babuza kin-pún tiòh m̄-bat khòaⁿ--kòe! Sím-mih ì-sù beh ná-ē chai? Babuza mā-sī kàu chit-má chiah chai-iaⁿ Tâi-gí beh án-chóaⁿ thák! Tâi-gí thák-chò “sī”, piáu-sī “ài,ài chiáh, hoaⁿ-hí “ ê ì-sù. M̄-kú tng-sī kin-pún m̄-chai chit-khō ō-á han-chî! Babuza kan-ta chai-iaⁿ 好 ū 2 chióng ì-sù:kap báí tò-péng sī hó; koh chit-ê sī ài, kah-ì. Babuza sim-koaⁿ liáh thán-hōaiⁿ, chhân-chhân tâu-koaⁿ kâ chhiat gō-kak, kâ tòng-chò kah-ì ê ì-sù chiū tōa-tōa pān kâ siá--lòh--khì! Tī chhù-lāi chhī pēh-niáu-chhī, chhī hún-chiáu, chhī thò-á, chhī niū-á, ka niáu-chhī-á bóe-liu, sng lò-chú ang-á, tēng kan-lók, ī ang-á-phiau, tiak

chin-chu-á, pòah phé-sī, phah chiáu-á, tēng tang tēng sai... Hit-tang-chūn gín-á-lâng ê pō-sò lóng-chóng mā chiah hiah-ê nā-tiāⁿ! Kán-tan láu-sit kâ siá siá --chhut--lâi. Put-kóan i sam-chhit jī-cháp-it tiòh kâ kau--chhut--khì. Ôan-sēng i jîn-seng ê thâu-chit-pái ê seng-hák khó-chhì!

Chiū-sī án-ne Babuza hô-lí hô-tô bong-tiòh chit-keng chhō-tiong thang thák! I ê sēng-chek sī 152.8 hun. Liók-chhú jit-kan-pō! Hit keng hák-hāu kiò-chò Tâi-pak Kōan-lip Sam-tiōng Chhō-kip Tiong-hák(台北縣立三重初級中學).

Sò-jī ê bī-chhai

Ng Chin-kiù, Ottawa

⦿ **4 kha lòh tē 8 kha kiu,
3 thiô (thâu) 6 hīⁿ, 5 bák-chiu.**
Ioh chit-ê chēng-hēng.

(Tap) Chit-ê tók-gán lāng kap i ê pēng-iú teh kng chit-chiah ti.

⦿ **Gín-á tī σ-pang téng òe chit-chiah káu-á, teng-bin hē 13 khō, ioh tiòh ê lāng ē-sái théh hit 13 khō chò pò-siúⁿ.**

Iòh Tiong-kok lèk-sú siōng chit-ê chhut-miâ ê chiong-kun.

(Tap) Chhit káu lák 13, Lâu-pang.